



Il chaste Aspermont a Sagogn.

FOTO J. MENOLFI



Castrisch cun la baselgia reformada.

FOTO J. MENOLFI

Sagogn e Castrisch

Anteriu center da la Foppa al passadi vegl sur il Rain Anteriu

■ **Fin en il temp medieval tardiv colliava il passadi vegl sur il Rain ils vitgs da Sagogn e Castrisch. Per motivs economicos e da traffic è il center da la Foppa sa spustà silsuenter da Sagogn a Glion.**

Sagogn

Vischnanca politica, circul Glion, district Surselva (avant il 2001 Glogn), situada al nord sur il Rain Anteriu a l'ur d'ina pitschna planira en la Foppa, cun las parts Vitg Dadens e Vitg Dado. 765 Secanio (copia), tudestg Sagens (fin il 1943). 1803 399 abitants; 1850 535; 1900 405; 1950 492; 1970 383; 2000 597. Rechats archeologics scuverts sin la mota dal chaste da Schiedberg cumprovan ina colonisaziun cuntinuanta dal temp da bronz fin en il temp autmedieval. En il 8avel tschientaner sa chattava al vest da Schiedberg il center dal domini dals Zaccos/Victorids. L'onn 765 ha testamentà l'investg Tello a la claustra da Mustér ina chasa signurila cun accessoris, bains purils, ers, prads, vignas ed alps. Ils bains sa chattavan en il Vitg Dadens (*vicus*) ed en ils *bofs* (Vitg Dado), a *Bregl da Heida* (bandunà en il temp autmedieval) ed a Schiedberg (*castrum*) sco era ordaifer il territori odiern da la vischnanca. En il temp autmedieval e medieval tardiv era Schiedberg la residenza dals signurs von Sagogn; la tur ed il domini èn sparids enturn il 1390. Ulteriurs possessurs da terren a Sagogn èn stads las claustras da Mustér, da Curvalda e da S. Gliezi/Cuira, l'investgieu da Cuira, ils Belmonts e Montalts sco era purs libers. Da ca. 1390 en fin 1538 è stà il chaste da Fraisen (Aspermont), situà en il Vitg Dado, la sedia dals administraturs episcopals sur ils subdits da la Chadé, domiciliads en Surselva. In avugà episcopal tegneva qua duas giadas l'onn dretgira. En il temp medieval tardiv è sa spustà il center da la Foppa da Sagogn a Glion – consequenza da midadas da la structura economica e da la situaziun da traffic.

La baselgia da S. Maria, menziunada gia l'onn 765, era il center d'ina pravenda gronda medievala che cumpigliava oriundamain, sper Sagogn, era Schluoin, Lags, Castrisch, Sevgein, Riein e Pitasch. Tenor las exchavaziuns, terminadas il 1990, è l'emprima baselgia cun chor e banc per ils sacerdots, construïda en il 5avel tschientaner, ina da las ovras las pli impurtantas dal cristianissem tempriv en Svizra. La separaziun ecclesiastica da Sagogn da las vischnancas cunfinantas ha durà dal temp autmedieval (Castrisch, Sevgein) fin il 1850 (Schluoin). La cretta reformada han adoptà mo ina minoritad dals da Sagogn, pastorada dal plevon da Castrisch u da Glion. Il santeri vegniva duvrà da domaduas confessiuns, il servetsch divin refurmà aveva lieu en ina chasa privata. Dispi-

tas confessionalas han provocà il 1701 bunamain ina guerra da religiu en il Grischun (Affar da Sagogn). Cun la construcziun da la baselgia barocca evangelica (1743) èn las duas confessiuns sa separadas definitivamain ina da l'autra.

Al territori da Sagogn han appartegnì dapli il temp medieval tempriv las culegnas exteriuras da Tuora e Foppas, situadas sur la chavorgia dal Rain, sco era Murschetg (documentà 1497) e Lavanuz (documentà 765) sur Lags. Fin a la reformaziun è stà Tuora in aclau cun set chasas ed in'atgna chaplutta (deditgada a s. Pieder) ch'ìls baruns de Belmont han cedì il 1333, ensemen cun quella da S. Maximin en il Vitg Dadens, a la claustra da S. Gliezi/Cuira. Il 1880 è Tuora vegnì bandunà sco abitadi permanent. Cun la separaziun da Lags enturn il 1500 ha pers Sagogn la plipart dals bains da muntogna (tranter auter era Murschetg e Lavanuz) ed alps. Il cudesch cun las leschas ed ordinaziuns communalas è vegnì redigì il 1715 en rumantsch e tudestg. In usit cultural popular, tgirà en il 17avel e 18avel tschientaner, è stà il *Litgun da Sagogn*, in grond canedel che vegniva preparà en il liber da la cumpagnia da mats da la vischnanca. Las famiglias dominantas a Sagogn en il 16avel–19avel tschientaner èn stadas ils Johbergs, Montaltas, Castell(i)s, Casutts e Steinhauers. Il 1799 ha subi la vischnanca donnas tras dispitas tranter partidas e passadis d'armadas estras (Suvorov). In center da l'emigraziun commerciala dal 19avel tschientaner è stada tranter auter la Frantscha. Anc il 1835 aveva Sagogn cun 584 abitants dapli avdants che Glion (574). In complex da manaschis commercialis ed industrialis en la Val da Mulin (mulin, resgia, fallun, ovra electrica, ustaria) è vegnì bandunà suenter il 1920. La chascharia dal vitg, utilisada dal 1870–1970, è daventada victima da la centralisaziun. Il 1903 ha Sagogn obtegnì ina staziun da la Viafier retica. Las scolas èn restadas separadas confessionalmain fin il 1914. Il 2005 lavuravan 32% da las persunas cun activitad da gudogn a Sagogn en il sectur secundar, 49% en il sectur terziar; numerus pendularis dal lieu, oravant tut en ils centers da la Val dal Rain Anteriu. Il svilup turistic a Lags e Flem ha effectuà ina ferma creschientscha da la parahotellaria a Sagogn cun intervenziuns massivas en la cuntrada. L'onn 2000 devi anc sis bains purils. Popolaziun da lingua rumantscha: 1920 94% (lingua materna); 2000 57,1% / 77,7% (meglra lingua / tuttas indicaziuns).

Martin Bundi

De Sagogn

Noblezza auta medievala, documentada per l'emprima giada il 1126 en connex cun la claustra da premonstratens da Rot fundada dals de Sagogn en vischinanza da

Biberach (Svevia Sura), cun la quala els èn restads colliads per vita duranta. Attestads en la Rezia Sura en il 12avel e 13avel tschientaner cun il possess central en la Foppa ed a Flem. Suenter il 1200 èn ils de Sagogn sa diramads en ils von Greifenstein e suenter il 1252 en ils von Wildenberg/Falera, numnads suenter il nov chaste (rumantsch Chischlatsch). En la mesadad dal 13avel tschientaner è la famiglia de Sagogn puspè sa dividida en consequenza da la colonisaziun en ils roms von Frauenberg e von Friberg ch'han adoptà omadus il num da lur chaste. Lur filiazions èn s'extinguïdas tranter il 1300 ed il 1330.

Martin Leonhard

Schiedberg

Cumplex fortifigà, situà al sidost dal Vitg Dado da la vischnanca da Sagogn sin ina collina da glera sur il Rain Anteriu. En il center da la ruina dal chaste sa chatta ina tur, lung il mir da tschinta meridional s'alingschan edifizis d'abitat represchentativs. Funtaunas archeologicas (exchavaziun d'urgenza 1964, ulteriuras perscrutaziuns 1968) cumprovan ina colonisaziun durant il temp preistoric, roman e medieval tempriv. A basa dals chats scuverts en occasiun da las exchavaziuns pon ins concluder ch'il chaste da Schiedberg è identic cun il *castrum* da Sagogn, menziunà en il Testament da Tello (765); ils Zaccos/Victorids possedeavan en quel ina chasa da crap da tempra signurila. Il chaste da Schiedberg è vegnì construì enturn l'onn 1000 ed amplifigà la davosa giada probablmain enturn il 1250. El era la sedia dals signurs de Sagogn, libers da noblezza, attestads il 1137/39. Il 1320 è Schiedberg passà tras ierta als conts de Werdenberg-Heiligenberg. Enturn il 1400 è il chaste daventà victima d'in incendi e n'è betg pli vegnì reconstruì. Causa sia gronda impurtanza istorica è el vegnì mess sut protecciun.

Maria-Letizia Boscardin

Tuverasca

Num dal district administrativ dals Francs, attestà en l'«Urbari curretiv dals bains imperialis» (ca. 840) cun la Surselva sur las Avas Sparsas a Trin e sur la chavorgia da Versomi. Il center da quest *Ministerium Tuverasca* era la Foppa cun il possess principal da l'administratur a Glion. Il num Tuverasca deriva da l'antieriura culegna da Tuora, situada amez il guaud grond da Flem (territori da la vischnanca da Sagogn) e va enavos sin il pled latin *tubus*, rumantsch bischen, vallun, via chavorgia.

Martin Bundi

Castrisch

Antieriura vischnanca politica, circul Glion, district Surselva (avant il 2001

Glogn), situada al passadi vegl sur il Rain Anteriu ed a la via da Sevgein vers Stussavgia; dapli il 2014 part da la vischnanca Ilanz/Glion. 765 *Castrices*, tudestg Kästris (fin il 1943). 1850 469 abitants; 1900 469; 1950 362; 1990 337; 2000 412. Craps-scalutta cun crenas, probablmain preistorics, sur il vitg. Il num Castrisch deriva dal latin *castrum* e renviescha ad ina fortificaziun tempriva al lieu da la baselgia da S. Gieri. En il temp medieval tempriv appartegneva Castrisch, probablmain ensemen cun Sevgein, a la plaiv gronda da Sagogn. La baselgia da S. Gieri, menziunada enturn l'onn 840 sco bain imperial carolingic cun dieschmas a Castrisch e Sevgein, cumpara enturn il 1340 sco plaiv autonoma. Reformaziun e separaziun ecclesiastica da Sevgein avant il 1537. En il 12avel tschientaner èn documentads nobels de Castrisch (1137/39 *de Castrisis*). Lur sedia signurila era probablmain la ruina Casti a l'ost da la vischnanca, in chaste cun chaplutta consecrada a s. Mitgel e cun dretg da collatura a S. Gieri. Il signuradi da Castrisch è stà en possess dals signurs de Belmont fin il 1371, alura è el passà als baruns de Razén; il 1390 è el daventà in feud episcopal dals conts de Sax-Mesauc ed il 1483 è el passà a l'investgieu da Cuira. Il 1538 è la vischnanca da Castrisch sa cumprada libra dals dretgs feudals episcopals. A Sessafret (oz Saissafretg u Sassafratg), a l'antieriu passadi sur il Rain, sa chattava il lieu da dretgira medieval dals uschenumnads Libers da Lags. Tenor la tradiziun han existì fin viaden il 19avel tschientaner sis mulins da graun a l'aual al vest da Castrisch. Da l'impurtanza oriunda da l'agricultura dattan era perditga las chasas cun portal en il center dal vitg. Construcziun da la staziun da la Viafier retica il 1903. Il vitg cun maioritad rumantscha (2000: 48,5% / 71,1% meglra lingua / tuttas indicaziuns) viva anc oz oravant tut da l'allevament da muvel e da l'economia d'alp (dretgs sin l'Alp Clavel, vischnanca da Lumbrein), cun ina modesta agricultura (tiric) e pumicultura en la planira dal Rain ed intginas interpresas da mastergnanza. La part dals pendularis dal lieu importava il 2000 69%. En ils onns 1970 e 1980 han ils da Castrisch refusà quatter giadas il dretg da votar da las dunnas sin plaun communal. Meglieraziun generala 1992–2008. Martin Bundi

De Castrisch

Nobels grischuns dal 12avel tschientaner, oriunds da Castrisch. Tenor ina tesa generalmain admissa fin qua duain ils baruns de Belmont avair ertà ils bains dals Castrisch suenter l'extincziun da quels il 1160. Probablmain eran ils Ca-

strisch dentant members d'ina lingia dals Belmonts che, suenter avair purtà per in tschert temp il num da lur chaste, han puspè adoptà lur num originar a la cumparsa d'ina autra famiglia Castrisch, da noblezza inferiura e betg parentada. La famiglia è menziunada per l'emprima giada en documents, en ils quals Hugo e Heinrich cumparan sco perditgas en la donaziun da Gamertingen dal 1137/39.

Martin Leonhard

Saissafratga

Part da la vischnanca da Castrisch, antieriu lieu da dretgira dals Libers da sur il guaud, menziunà sco *Sessafret* en l'urbari habsburgais (1303–07). Saissafratga era probablmain gia da quel temp il lieu da dretgira da la *centena* roiala (district administrativ) da Tuverasca. Il num Saissafratga deriva dal latin *saxa fracta* (rumantsch crappa rutta) ed è vegnì substituì en il 16avel tschientaner tras *Sassafratg*. Saissafratga sa chattava a la veglia punt che manava al nord da Castrisch sur il Rain (destruïda da l'aua gronda il 1520 ed il 1693). Il glindesdi da Tschuncaisma salvavan qua ils Libers lur cumin (l'uschenumnà glindesdi superbi) e da s. Mitgel (29 da settember) respectivamain da s. Hilari (13 da schaner) tegnevan els per regla dretgira. L'antieriu guaud da fau a Saissafratga (oz spari), menziunà en l'urbari habsburgais (1303–07) sco possess roial, serviva da revier da chatscha a la signuria roiala. L'ipotesa, tenor la quala Saissafratga sa chattava sper Marcau en vischinanza da Lags è obsoleta.

Adolf Collenberg



Il passadi vegl sur il Rain Anteriu a Saissafratga (Sassafratg).

Lexicon Istoric Retic

Il LIR cumpiglia bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.